

Supervizor Gregorian smijenio dva pripadnika Policije distrikta Brčko

Supervizor za Brčko, Raffi Gregorian, danas je izdao naloge supervizora kojima se gdin Slobodan Katanić i gdin Đorđe Popović razrješavaju sa dužnosti u Policiji distrikta Brčko.

On je izdao naloge nakon što je Apelaciono povjerenstvo donijelo rješenje da je u odlukama Disciplinskog povjerenstva o prestanku radnog odnosa gdina Katanića i gdina Popovića u Policiji distrikta Brčko bilo proceduralnih nedostataka. Pošto nije bilo indicija da se dovodi u pitanje suština odluke o prekidu radnog odnosa, supervizor Gregorian je ustvrdio da je u najboljem interesu Distrikta i Policije distrikta Brčko da obojicu smijeni sa dužnosti. Sve drugo bi dovelo do dugotrajnog postupka tijekom kojeg bi moralu i učinku policije bila nanijeta dodatna šteta.

Kako je supervizor ranije istakao, on je već odavno bio spremam da smjeni gdina Katanića i gdina Popovića s njihovih dužnosti u Policiji distrikta Brčko, ali se prethodno uzdržao od izdavanja naloga o smjeni jer je šef Policije Brčkog rekao da će pokušati učiniti da oba zvaničnika poboljšaju svoje ponašanje, a ukoliko to ne uspije, da će se protiv njih pokrenuti utvrđeni disciplinski postupak.

Postojalo je dovoljno razloga za izdavanje naloga o smjeni. Duže od godinu dana, supervizor Gregorian je dobivao potkrijepljena izvješća o kršenju službenih dužnosti, težim povredama dužnosti, neprofesionalnosti, neadekvatnom radu u službi i drugim postupcima gdina Katanića i gdina Popovića da naruše učinkovitost Policije Distrikta.

Supervizor napominje da je Tribunal za Brčko presudan značaj dao uspostavljanju profesionalnih, multietničkih, demokratski

orijentiranih i odgovornih policijskih snaga u distriktu Brčko. Pridržavanje najviših standarda profesionalnosti i nepristrasnosti u Policiji distrikta Brčko, a naročito među njenim visokim rukovodiocima, ključno je za poboljšanje povjerenja građana u Policiju distrikta Brčko.